

Nunat Avannarliit Killiit Siunnersuisoqatigiiffiata Savalimmiuni, Islandimi Kalaallit Nunaannilu naalackersuisunut kaammattuutigaa allanniarnermik atuarniarnermillu ajornartorsiuteqartunut atuartinneqarnissamik neqeroorut suleqatigiillutik nukittorsassagaat.

Assersuutigalugu suliassaqarfimmi ataatsimut ilisimatusarnikkut aammalu nunat oqartussaasuisa susassaqartut suleqatigiinnissaata qulakkeerneratigut, taamaalilluni ilisimasaniq iliuutsinillu pitsaanerpaaniq avitseqatigiinnissaq qulakkeerneqarsinnaaqullugu.

(Inatsisartut Siulittaasuut)

Akissuteqaat

(Ilinniartitaanermut, Ilageeqarnermut, Kultureqarnermut Naligiissitaanermullu Naalackersuisoq)

Siullermeerinnineq

Allanniarnermik atuarnermillu ajornartorsiuteqartunut nunani taakkunani pingasuni atuartitsinermi neqeroorutinik Savalimmiuni, Kalaallit Nunaanni Islandimilu Naalackersuisut suleqatigiillutik pitsanngorsaanissaat pillugu Nunat Avannarliit Killiit Siunnersuisoqatigiiffiata kaammattuutaa Naalackersuisut iluarisimaarpaat.

Nunatsinni inuppassuit atuarniarnermik allanniarnermillu ajornartorsiuteqartut suli ullumikkut takusarpagut. Ajornartorsiutit taakku inuit ataasiakkaat tamanut tunngasunik inuuniarneranni atugassarisaannut aammalu inuussutissarsionermi pingaartumillu ilinniartitsinermi iliuuseqarsinnaanerannut sunniuteqartorujussuusinnaapput.

Danmarkimi missingerneqarpoq sulisut 5 aamma 15 %-it akornanni assigiinngitsunik annertussuseqartunik atuarniarnermik aamma/imaluunniit allanniarnermik ajornartorsiuteqartut. Kisitsisit taakku nunatsinnut nuukkutsigit assigissavaat, inuit 1800-t 5550-llu akornanni taakkuninnga ajornartorsiuteqartut. Kisitsisilli taakku sulisut ilinniagaqanngitsut amerlanerat eqqarsaatigalugu nunatsinni qaffasinnerusinnaapput.

Tassunga peqatigitillugu nassuerutigisariaqarparput inuit atuarniarnermik allanniarnermillu ajornartorsiuteqartut siusissukkat paasineqarnissaannut taparserneqarnissaanullu pisariaqartunik sakkusaqanngitsugut periuseqanngitsugullu. Naqinnernik ilisarinnissaanngitsuarneranik imaluunniit atuarniarnermik allanniarnermillu ajornartorsiuteqartoqarneranik ilimatsaassaartoqartillugu paasiniaarnermi atortunik misiliinermilu periutsinik ilinniartitsisut suliameqatigut ingerlatsisut allat atorsinnaasaannik tatiginartunik ineriartortitsinissamik pisariaqartitsinannangilagut. Aamma ajornartorsiuteqartunik ilinniartitsinermi atortut amigaatigaagut, aammalu atuarniarnermik allanniarnermillu ajornartorsiuteqartut paasineqarsinnaatinniarlugit iliuuseqarfiginiarlugillu meeqqat atuarfianni ilinniartitsisunik ullumikkut pikkorissartitsisarnerit ilinniaqqinnissamullu periarfissat naammannatik. Naggasiullugu ilisimatusarnerit ineriartortitsinerillu naleqquttut

atorlugit ajornartorsiut pillugu annikitsuararsuarnik misilittagaqalernikuuvugut. Taamaalilluni immikkoortumi ilisimasat amigaataanerisa inuillu isumalluutit ajornartorsiummik ilisimasaqartut amigaataanerisa qitiusumiit anguniagaqarluni iliuuseqarnissamut periarfissaqarneq ajornakusoortippaat.

Ajornartorsiut iliuuseqarfiginiarlugu Ilinniaatsinut Institutti ukiuni pingasuni ineriartortitsinermut suliniummik siunnersuusiornikuuvoq, tassanilu ilaatigut ajornartorsiuteqartunik paasiniaanermi atortut atuartitsinermilu atortut ineriartinneqarnissaat siunertaarpiarpoq. Ilinniaatsinut institutti tamassuma saniatigut immikkoortumi siunnersortimik atorfinitsitsiniarpoq, taassumalu ineriartortitsinerit ataqatigiissassavai aammalu inunnik suliamik ingerlatsisunik pikkorissartitsinerit ilinniaqqinnerillu pilersaarusiortassallugit.

Naalackersuisut qularutigingilaat nunani avannarlerni killerni misilittakkat ilisimasallu ineriartortitsiniarnitsinnut pitsaasumik tapersiissasut, suliniutillu aallartinnikuusagut nunanit allanit immaqa isumassarsiffigineqarsinnaassallutik. Allanniarnermik atuarniarnermillu ajornartorsiuteqartunik atuartitsinermi neqeroorutigut pitsanngorsarniarlugit Islandi Savalimmiullu suleqatigineqarluarnissaat Naalackersuisut taamaamat qilanaaraat aammalu siunnersuummi siunertat pitsaasut iliuuseqarfiginissaannut ilinniarfigut tapersiitissallugit.